

Հ Ա Շ Վ Ե Տ Վ ՈՒ Թ Յ ՈՒ Ն

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱՐՄԱՎԻՐԻ ՄԱՐԶՊԵՏԻ ԱՇԽԱՏԱԿԱԶՄԻ
2022 ԹՎԱԿԱՆԻ ԳՈՐԾՈՒՆԵՈՒԹՅԱՆ**

(սեղմագիր)

Ֆինանսական բնագավառ

Պետական ֆինանսների կառավարման համակարգի ռազմավարական նպատակները հաշվետու ժամանակաշրջանում ուղղված են եղել հանրային կառավարման համակարգի լավագույն արդյունքի և հասարակությանը որակյալ հանրային ծառայությունների մատուցմանը, հանրային կյանքի բարելավմանն ուղղված ծրագրերի իրականացման համար արդյունավետ միջավայրի ստեղծմանը: Պետական կառավարման համակարգի արդյունավետությունն ուղղակիորեն կապված է եղել հանրային միջոցների արդյունավետ ծախսման հետ: Ծախսային քաղաքականության արդյունավետության բարձրացման տեսանկյունից հաշվետու ժամանակահատվածում մարզպետարանում ապահովվել է հանրային ֆինանսների նպատակային, խնայողաբար և արդյունավետ օգտագործումը:

Մարզի համայնքների սեփական եկամուտների հավաքագրումը 12. 12. 2022թ. դրությամբ հասցվել է 86. 8%-ի նախորդ տարվա 102,7%-ի համեմատ: 2022թ. ընթացքում ՀՀ Արմավիրի մարզի համայնքներին պետական բյուջեից տրամադրվել է 5,617,097. 8 հազ. դրամ դոտացիա, որից 5,148,806.8 հազ. դրամը տրամադրվել է համայնքներին՝ 2022 թվականի 11 ամիսների հաշվարկով: Հաշվետու ժամանակահատվածում աջակցություն է ցուցաբերվել մարզի տեղական ինքնակառավարման մարմիններին համայնքների բյուջեների նախագծերի նախապատրաստման և բյուջետային միջոցների արդյունավետ կառավարման հարցում:

Գյուղատնտեսության, շրջակա միջավայրի պահպանության և հողօգտագործման բնագավառներ

Գյուղատնտեսության բնագավառում կազմակերպվել և համակարգվել են 2022թ. հունվարի 1-ի դրությամբ համայնքներում առկա անասնազլխաքանակի համատարած հաշվառման աշխատանքները: Մարզում հաշվառվել է 55216 գլուխ խոշոր եղջերավոր կենդանիներ, մանր եղջերավոր՝ 140518, խոզեր՝ 18042, 1379394 թռչուններ: Գյուղատնտեսական կենդանիների պատվաստում ծրագրի շրջանակներում իրականացվել են պլանով նախատեսված հակահամաճարակային կանխարգելիչ բոլոր միջոցառումները: Իրավիճակը մարզում բնութագրվում է կայուն:

Համակարգվել է մարզում գործող «Ոռոգում – Ջրառ» ՓԲԸ-ի մասնաճյուղերի և 3 ԶՕԸ-ի գործունեությունը: 233,3 կմ միջտնտեսային, 4981,2 ներտնտեսային ցանցերը, 338 խորքային հորերը և 62 պոմպակայանները պատրաստ են եղել ջրամատակարարմանը, որը սկսվել է ս/թ ապրիլի 1-ից: 2022թ. ընթացքում մարզում մաքրվել է 51,3 կմ երկարությամբ բաց դրենաժային համակարգ 13 համայնքներում:

Ուսումնասիրվել և գույքագրվել է մարզի տարածքով հոսող Արաքս, Մեծամոր և Քասախ գետերի, ինչպես նաև հեղեղատարների հունների մաքրման և ափապատնեշների ամրացման նպատակով իրականացվելիք աշխատանքները և ներկայացվել է ՀՀ կառավարություն: Արդյունքում մաքրվել է Մեծամորի հեղեղատարի հունը շուրջ 1000 մ երկարությամբ և 150 մ երկարությամբ իրականացվել է ափապատնեշի բարձրացում:

Համայնքներում իրականացրել են գյուղատնտեսության ոլորտի պետական աջակցության պատշաճ ներկայացման, հնարավոր շահառուների ցուցակագրման և նրանց խմբերի ընդլայնմանն ուղղված աշխատանքներ, համակարգվել են 2022թ. հունիսի 1-ի դրությամբ մարզի համայնքներում կատարված ցանքատարածությունների համատարած հաշվառման աշխատանքները՝ մարզում ցանքատարածությունները կազմել է 24077,6հա:

Համակարգվել են հողօգտագործողներին մատչելի գներով ազոտական, ֆոսֆորական և կալիումական պարարտանյութերի ձեռքբերման աջակցության ծրագրով նախատեսված

աշխատանքները, մարզ է ներկրվել 5230,65 տոննա ազոտական պարարտանյութ, որից կարբամիդ 922,65 տոննա, որը բաշխվել է թվով 9257 հողօգտագործողների:

Իրականացվել են մարզում տեղակայված 239 հակակարկտային կայանների ապակոնսերվացման, լիցքավորման և առկա թերությունների վերացման աշխատանքներ:

Համակարգվել են պտղի, բանջարեղենի և խաղողի մթերման աշխատանքները: Ըստ համայնքների, բնակավայրերի և ըստ հողօգտագործողների ցուցակները ներկայացվել են ՀՀ էկոնոմիկայի նախարարություն՝ որոնք չունեն կնքված պայմանագրեր: Մարզպետի անմիջական վերահսկողությամբ հնարավոր դարձավ մթերել խաղողի արտադրված ողջ բերքը:

Մարզի համայնքներում ընդերքօգտագործման և շահագործման կանոնների պահպանման և փաստաթղթերի օրինականության պահպանման ուղղությամբ կատարել են մշտական այցելություններ և ուսումնասիրություններ:

«Հայաստան Ծառատունկ» ծրագրի շրջանակներում մարզում տնկվել են 5099 գեղատեսիլ ծառեր և թփեր: Հաշվետու ժամանակահատվածում մարզում հիմնվել են 1631,52 հա բազմամյա տնկարքներ, որից խաղող՝ 164,28 հա, պտուղ՝ 1467,24 հա, որից ինտենսիվ՝ 855,4 հա:

Կատարված մոնիթորինգի արդյունքում 4 համայնքների մկներով վարակված 1710 հա-ի վրա իրականացվել են պայքարի աշխատանքներ: Գրեթե ավարտվել է Եվրոպական զարգացման բանկի ֆինանսավորմամբ ներտնտեսային ոռոգման համակարգերի վերականգնման ծրագիրը, որի արդյունքում վերականգնվել է 39 բնակավայրերի 92066 մ երկարության ոռոգման ներտնտեսային ցանցերը: Պետություն – համայնք համագործակցության սուբվենցիոն ծրագրով մեկնարկել է Մեծամոր համայնքի 12 բնակավայրերում ոռոգման 15 խորքային հորերի վերակառուցումը:

Հողաշինություն և հողօգտագործում. Հողերի օգտագործման ժամանակավոր սխեմաների հաստատման նպատակով սահմանված կարգով կազմվել ՀՀ քաղաքաշինության կոմիտե են ներկայացվել Արագած, Մայիսյան, Նալբանդյան, Արաքս, Մրգաշատ, Փշատավան, Քարակերտ, Ապագա, Մարգարա, Հայկաշեն, Ակնալիճ, Հուշակերտ բնակավայրերում հողերի նպատակային նշանակության փոփոխության վերաբերյալ հողաշինական գործերը: Միջգերատեսչական հանձնաժողովի, ինչպես նաև քաղաքաշինության կոմիտեի կողմից տրված եզրակացությունները ներկայացվել են համայնքների ղեկավարներին՝ առաջարկելով ընդունել ավագանու համապատասխան որոշումներ և կատարել պետական գրանցումներ:

Վերահսկողություն է իրականացվել մարզի համայնքներում հողամասերի նպատակային նշանակության փոփոխություն կատարելու հետևանքով կատարված աշխատանքների նկատմամբ: Իրականացվել է համայնքների վարչական սահմաններում գտնվող հողամասերի աճուրդային վաճառքի և վարձակալության տրամադրման վերաբերյալ տվյալների հավաքագրում, ամփոփում և տեղեկատվություն է ներկայացվել ՀՀ տարածքային կառավարման նախարարություն: Կազմակերպված ուսումնասիրությունների արդյունքում մարզի Արմավիր Վաղարշապատ, Բաղրամյան, Մեծամոր, Խոյ և Արաքս համայնքների բնակավայրերի համար տրվել է եզրակացություն՝ բարձրաժեք հողատեսքերը ցածրաժեք հողատեսքերի փոխադրելու վերաբերյալ: Մարզում «ՔՈԱՖ ՍՄԱՐԹ» կենտրոն հիմնելու նպատակով «Հայաստանի մանուկներ» բարեգործական հիմնադրամին հողատարածք հատկացնելու համար օրենքով սահմանված կարգով Արմավիրի համայնքապետարանի հետ կազմվել և ՀՀ կառավարություն են ներկայացվել հողամասերի վկայականները, հատակագծերը և ՀՀ կառավարության «Հողամասի նվիրաբերությանը համաձայնություն տալու մասին» որոշման նախագիծը: Քննարկման արդյունքում ՀՀ տարածքային կառավարման և ենթակառուցվածքների նախարարություն են ներկայացվել 2022 թվականի համար տիեզերալուսանկարների պահանջարկի վերաբերյալ հայտերը: Ընթացքի մեջ են ՓՀԷԿ-երի սեփականությունը հանդիսացող հողամասերի կադաստրային քարտեզներում հողամասերի սահմանների և տեղադիրքերի սխալների, ինչպես նաև

նպատակային ու գործառնական նշանակությունների անհամապատասխանությունների շտկման ուղղությամբ տարվող աշխատանքները: ՀՀ կադաստրի կոմիտեի e-cadastre.am էլեկտրոնային հարթակում առկա հասցեների և փաստացի հասցեավորման վերաբերյալ համայնքապետարաններում առկա տվյալների համեմատման ուղղությամբ տարված աշխատանքների արդյունքում բացի Վաղարշապատ և Փարաքար համայնքներից մյուս համայնքներում իրականացվել են ճշգրտման աշխատանքներ: Օրենքով սահմանված կարգով կազմվել և ՀՀ կառավարության հաստատման է ներկայացվել մարզի 2022թ. հողային հաշվեկշիռը, ինչպես նաև մարզի ցամաքային տարածքի ծածկույթի դասակարգումը ներկայացվել է շրջակա միջավայրի նախարարություն: Աշխատանքներ են տարվել «Հարավկովկասյան երկաթուղի» ՓԲԸ-ի տնօրինության տակ գտնվող հողատարածքներում ապօրինի հողօգտագործման երևույթները կանխելու ուղղությամբ:

Քաղաքաշինության բնագավառ

Քաղաքաշինությունը և, մասնավորապես շինարարության ոլորտը, մարզի տնտեսության առավել դինամիկ զարգացում արձանագրող բնագավառն է: Քաղաքաշինության ոլորտում 2022թ. ընթացքում իրականացրել են հետևյալ գործառնությունները՝

- Տեղական ինքնակառավարման մարմիններում, համապատասխան համայնքի վարչական տարածքում ինքնակամ և քաղաքաշինական ծրագրային փաստաթղթերին չհամապատասխանող շինարարությունների հայտնաբերման, կանխման, կասեցման, օրենքով սահմանված կարգով միջոցառումների իրականացման աշխատանքները:
- Սուբվենցիաների և առաջնահերթ լուծում պահանջող խնդիրների վերաբերյալ ծրագրերի նախագծանախահաշվային փաստաթղթերի ձեռքբերման և ուսումնասիրման գործընթացի ուսումնասիրություն,
- ՀՀ օրենսդրությամբ սահմանված կարգով կառուցապատման քաղաքաշինական փաթեթները համաձայնեցվել են ՀՀ քաղաքաշինության կոմիտեի հետ և Արմավիրի մարզպետի հետ:
 - Իրականացվել են մշտադիտարկման գործառնություններ 2020-2021թթ.. սուբվենցիոն ծրագրերով ավարտված շուրջ 53 օբյեկտներում և 2022թ. սուբվենցիոն ծրագրերով իրականացվող 29 շինարարական օբյեկտներում:
 - Իրականացվել են ՀՀ Արմավիրի մարզի մի շարք ավագի հանքերում մասնագիտական ուսումնասիրություններ:
 - Իրականացվել են մարզպետարանի ենթակայության ուսումնական հաստատությունների շենքերի և տարածքների /հողամասերի/ տեխնիկական վիճակի մասնագիտական ուսումնասիրություններ:
 - Կատարվել են Նոր Արմավիր համայնքում, 2021թ. դեկտեմբերի 7-ին հրդեհի, 2022թ. ուժեղ քամու և պտտահողմի հետևանքով մի շարք բնակավայրերում շենք-շինություններին պատճառված վնասների վերաբերյալ ուսումնասիրության աշխատանքներ, որոնք ներկայացվել են ՀՀ արտակարգ իրավիճակների նախարարությանը և ՀՀ ԱԻՆ ՓԾ Արմավիրի մարզային փրկարարական վարչությանը:
 - Համակարգվել են ՀՀ Արմավիրի մարզի միկրոռեգիոնալ մակարդակի համակցված տարածական պլանավորման փաստաթղթերի նախագծերի մշակման աշխատանքների ընթացքը:

Ճանապարհաշինության բնագավառ: ՀՀ Արմավիրի մարզի ճանապարհների ընդհանուր երկարությունը կազմում է 610,8կմ, որից միջպետական նշանակության՝ 123,2կմ, հանրապետական նշանակության՝ 95,8կմ և մարզային /տեղական/ նշանակության՝ 391,8կմ: 2022թ. հաշվետու ժամանակահատվածում մարզային նշանակության ճանապարհների ընթացիկ ամառային և ընթացիկ ձմեռային պահպանության կատարված աշխատանքների համար ՀՀ պետական բյուջեից հատկացվել է

53,5մլն դրամ: 2022թ. սուբվենցիոն ծրագրով բնագավառում իրականացվում են ճանապարհների վերանորոգման, հիմնանորոգման, ասֆալտապատման, ինչպես նաև բնակավայրերի փողոցների տուֆով սալարկման շինարարական աշխատանքներ, որոնց որակի վերահսկողության նկատմամբ իրականացվում է մշտական հսկողություն:

2022թ ընթացքում նախատեսվում է նաև ՀՀ պետական բյուջեի միջոցներով հիմնանորոգել՝

- S-3-11 /Հ-15/ /Արմավիր գյուղ/- Նալբանդյան – Գետաշեն – Նոր Կեսարիա մարզային նշանակության ճանապարհի, Նալբանդյան – Գետաշեն 4,0 կմ հատվածը,
- S-3-16 Արևիկ /S-3-50/ -/Հ-15/ /գյուղ Արմավիր/մարզային նշանակության ճանապարհը -3,6կմ,
- S – 3 -52 /Մ-5/- Ամնասիա– Նալբանդյան/ S-3-11/ - Զանֆիդա – Փշատավան– /Հ-15/ / Արգավանդ/ մարզային նշանակության ճանապարհի Փշատավան – Արգավանդ 4,2կմ հատվածը:

Տրանսպորտ: Մարզի գրեթե բոլոր համայնքները կապված են տրանսպորտային կապով մարզկենտրոնի հետ: Մարզի համայնքներից մարզկենտրոն և տարածքային կենտրոնների ուղղություններով գործում է 11 ավտոբուսային (թվով 21 ավտոբուս) և 11 միկրոավտոբուսային (թվով 25 միկրոավտոբուս) ներմարզային երթուղիներ, իսկ մարզի համայնքներից դեպի մայրաքաղաք գործում են 16 ավտոբուսային և միկրոավտոբուսային միջմարզային երթուղիներ: Արմավիրի մարզկենտրոնից դեպի այլ մարզեր գործում է 3 ավտոբուսային և 2 միկրոավտոբուսային երթ:

Կրթություն, մշակույթ, երիտասարդություն և սպորտ

Հաշվետու ժամանակահատվածում գերակա խնդիր է եղել կրթության զարգացումը: Մարզային մակարդակում կրթության համար առանցքային են եղել ներառական կրթական միջավայրի ստեղծումը, կրթության բովանդակության և կրթության ծրագրերի, անհրաժեշտ ենթակառուցվածքների արդիականացումը և վերազինումը, ժամանակակից տեղեկատվական տեխնոլոգիաների լայն կիրառումը ուսուցման և կառավարման համակարգում:

ՀՀ Արմավիրի մարզպետարանի ենթակայությամբ գործում է 111 հանրակրթական ուսումնական հաստատություն, որից հիմնական դպրոց՝ 20, միջնակարգ դպրոց՝ 91: 2021-2022 ուսումնական տարում մարզի դպրոցների աշակերտների թիվը կազմել է՝ 35306, դպրոցահեն 53 նախակրթարանների սաների թիվը՝ 1377, համընդհանուր ներառական կրթության կարիք ունեցող երեխաների թիվը՝ 573: Գործող նախադպրոցական ուսումնական հաստատությունների թիվը՝ 61, սաների թիվը՝ 4800:

2022 թվականի ընթացքում իրականացվել են հետևյալ աշխատանքները՝

«Տարածքային կառավարման մասին» ՀՀ օրենքով մարզպետին վերապահված լիազորությունների շրջանակում մարզպետարանի ենթակայությամբ գործող 111 հանրակրթական ուսումնական հաստատություններից 17-ում մարզպետի համապատասխան որոշմամբ ստեղծված աշխատանքային խումբն իրականացրել է մշտադիտարկման աշխատանքներ: Աշխատանքային խմբի կողմից ուսումնասիրվել են դպրոցի բնականոն գործունեության, ուսումնական և դաստիարակչական աշխատանքների կազմակերպումը:

Մշտադիտարկման ընթացքում դպրոցների տարբեր դասարաններում տրվել են գրավոր աշխատանքներ «Հայոց լեզու» և «Մաթեմատիկա» առարկաներից՝ մարզում նշված առարկաների ուսուցման որակի վերաբերյալ ընդհանրական տեղակատվություն կազմելու նպատակով:

Դպրոցների տնօրեններին հանձնարարվել է սեղմ ժամկետներում վերացնել արձանագրված խախտումները և թերությունները՝ ապահովելով կրթության որակը:

2021-2022 ուսումնական տարվա 2-րդ կիսամյակի ընթացքում (2022թ. փետրվար-մայիս ամիսներ) ուսումնասիրված 12 դպրոցների համապատասխան դասարաններում 2022-2023

ուսումնական տարվա 1-ին կիսամյակի ընթացքում (2022 թվականի հոկտեմբեր-նոյեմբեր ամիսներ) տրվել են գրավոր աշխատանքներ «Հայոց լեզու» և «Մաթեմատիկա» առարկաներից:

ՀՀ Արմավիրի մարզի հանրակրթական դպրոցներում մշտադիտարկման և կազմակերպության գործունեության վերահսկողության աշխատանքները կշարունակվեն նաև 2023 թվականի ընթացքում:

- 2022 թվականին Արմավիրի մարզից ՀՀ բուհերի ընդունելության քննություններին մասնակցելու հայտ է ներկայացրել 948 դիմորդ, որոնցից ընդունվել է 682-ը (71.9%):
- Աջակցություն է ցուցաբերել հանրակրթական ուսումնական հաստատությունների տնօրենների մրցույթների կազմակերպմանը: 2022 թվականին մարզպետարանի ենթակայությամբ գործող հանրակրթական դպրոցի տնօրենի թափուր պաշտոնի համար հայտարարվել է 31 մրցույթ:
- Վերահսկողություն է իրականացվել հանրակրթական ուսումնական հաստատություններում անցկացվող ուսուցչի թափուր տեղի համար հայտարարված մրցույթների անցկացման նկատմամբ:
- Մարզում կազմակերպվել և անցկացվել է դպրոցականների՝ 2021-2022 ուստարվա օլիմպիադաների տարածքային և մարզային փուլերը: Հումանիտար և բնագիտական առարկաներից տարածքային փուլին մասնակցած 1096 աշակերտից մարզային փուլին երաշխավորվել և մասնակցել է 209 աշակերտ: Մարզային փուլի՝ 209 մասնակցից հանրապետական փուլին երաշխավորվել է մասնակցել 62 աշակերտ:

2022 թվականի ընթացքում անցկացված հանրապետական փուլի արդյունքներով Արմավիրի մարզի աշակերտներն ունեն՝ 4 հատ 1-ին կարգի, 4 հատ 2-րդ կարգի և 4 հատ 3-րդ կարգի դիպլոմ, ևս 13 հատ գովասանագիր:

ՀՀ Արմավիրի մարզի 12-րդ դասարանի աշակերտները մասնակցել են Երևանի Պետական Համալսարանի կողմից կազմակերպված օլիմպիադային: Նրանցից 37-ը 2022 թվականին հաղթող են ճանաչվել օլիմպիադայի եզրափակիչ փուլում: Նրանցից 2-ն արժանացել են 1-ին կարգի դիպլոմի, 2-ը՝ 2-րդ կարգի դիպլոմի, 6-ը՝ 3-րդ կարգի դիպլոմի, ևս 27-ը՝ գովասանագրի:

- ՀՀ Արմավիրի մարզպետարանի ենթակայությամբ գործող 111 ուսումնական հաստատությունների՝ 2022 թվականին պարտադիր ատեստավորման ենթակա 851 ուսուցիչներ վերապատրաստվել են (2021 թվականին վերապատրաստվել և ատեստավորվել է 561-ը), 2022 թվականի դեկտեմբեր ամսին ընթանում է պարտադիր ատեստավորման գործընթացը:
- 2022 թվականին մարզի 64 ուսուցիչներ մասնակցել են ուսուցիչների կամավոր ատեստավորմանը և ընդգրկվել հավելավճարների տրամադման ծրագրում:
- Նոր նախակրթարանների ստեղծման համար ՀՀ ԿԳՄՍ նախարարություն է ներկայացվել հայտ Արմավիր, Մյասնիկյան, Բերքաշատ, Զարթոնք, Տարոնիկ, Ակնաշեն, Դալարիկ, Երվանդաշատ և Մուսալեռ բնակավայրերում գործող հանրակրթական ուսումնական հաստատություններում նախակրթարաններ ստեղծելու նպատակով:
- ՀՀ կառավարության 2021 թվականի մայիսի 5-ի N 823-Ն որոշման համաձայն «Մոդուլային տիպի մանկապարտեզների շենքային ապահովում» միջոցառման շրջանակներում 2022թ. ընթացքում Այգեվան, Լենուդի, Գետաշեն, Նորավան և Փշատավան համայնքներում մոդուլային տիպի մուլտիմանկապարտեզի կառուցման համար կատարվել են նախագծանախահաշվային աշխատանքներ: Արևիկ համայնքում կառուցվում է մոդուլային տիպի մանկապարտեզ:
- Ֆերիկ համայնքում «12008.Նախադպրոցական այլընտրանքային ծախսաարդյունավետ մոդելների ներդրում» միջոցառման շրջանակում ստեղծվել է և 2022 թվականի սեպտեմբերից գործում է դպրոցահեն նախակրթարան:

- Հայաստանի Հանրապետության կառավարության և Ասիական զարգացման բանկի միջև իրականացվող դպրոցների սեյսմիկ անվտանգության բարելավման ծրագրի շրջանակներում ընթանում է Պտղունքի Տիգրան Մեծի անվան միջնակարգ դպրոցի կառուցման աշխատանքները:
- Սեյսմիկ անվտանգության բարելավման ծրագրի շրջանակներում ընթացքի մեջ են Փարաքարի միջնակարգ դպրոցի նոր շենքի կառուցման աշխատանքները, նախատեսվում է շահագործման հանձնել 2024 թվականին:
- Մրգաշատի և Զրարբի միջնակարգ դպրոցներում Հայաստանի Հանրապետության կառավարության և Ասիական զարգացման բանկի միջև իրականացվող դպրոցների սեյսմիկ անվտանգության բարելավման ծրագրի շրջանակներում նախատեսվում է դպրոցական նոր շենքերի կառուցում:
- ՀՀ պետական բյուջեի «1183 Ապահով դպրոց» ծրագրի շրջանակներում Արգինա համայնքում ավարտվում են փոքրաքանակ երեխաներով համալրված հանրակրթական դպրոցների մոդուլային շենքի կառուցման աշխատանքները:
- «Հայկաշենի Գ. Կիրակոսյանի անվան միջնակարգ դպրոց» ՊՈԱԿ-ը ընդգրկվել է ՀՀ 2022 թվականի պետական բյուջեով նախատեսված փոքրաքանակ երեխաներով համալրված հանրակրթական դպրոցների «մոդուլային» տիպի թվով 10 շենքերի կառուցման ծրագրում:
- Անհետաձգելի համարվող կապիտալ բնույթի ծախսերի ֆինանսավորման ծրագրում են ընդգրկվել մարզի 12 հանրակրթական դպրոցներ, ծրագրի շրջանակներում իրականացվելու են հիմնանորոգման և վերանորոգման, ինչպես նաև՝ ջեռուցման համակարգի կառուցման աշխատանքներ:
- 2022 թվականի սեպտեմբերից ՀՀ Արմավիրի մարզպետարան ենթակայությամբ գործող 66 դպրոցներ տարրական դասարանների աշակերտներին և նախակրթարանի սաներին տրամադրում են տաք սնունդ, իսկ 45-ը չոր սնունդ: Ընդհանուր առմամբ ներկայումս ծրագրում ընդգրկված է 14373 աշակերտ:

Մշակույթի, սպորտի և երիտասարդության բնագավառում

- «Ազգային, փողային և լարային նվագարանների գծով ուսուցում» ծրագրի շրջանակներում մարզի 14 երաժշտական և արվեստի դպրոցների 82 աշակերտների ՀՀ պետական բյուջեով հատկացվել է փոխհատուցում 17.866.500 ՀՀ դրամ:
- ԿԳՄՍ նախարարության և «Հարմոնիում» ՀԿ կողմից «Վարպետության դաս. մեկնարկ կրթամշակութային» ծրագրով մարզի արվեստի և երաժշտական դպրոցների 20 լավագույն աշակերտներ վարպետության դասեր են անցել արտասահմանյան և հայ լավագույն մասնագետների մոտ՝ դաշնամուր, ջութակ և թավջութակ մասնագիտությունների գծով:
- ԿԳՄՍՆ «Քույր դպրոցներ» ծրագրի շրջանակներում Արմավիրի մարզի և Երևան քաղաքի արվեստի և երաժշտական դպրոցների աշակերտների համատեղ համերգների և ցուցահանդեսների կազմակերպում:
- Հունվար-փետրվար ամիսներին կազմակերպվել է «ՀՀ վարչապետի գավաթ» սիրողական սեղանի թենիսի մրցաշարի համայնքային և մարզային փուլերը և 12 լավագույն թենիսիստներ մասնակցել են Չարենցավանում անցկացված հանրապետական եզրափակիչ փուլին:
- Ապրիլ-նոյեմբեր ամիսներին հանրակրթական դպրոցների 7-12-րդ դասարանների աշակերտների Սպարտակիադա 9 մարզաձևերից:
- Փետրվար-ապրիլ ամիսներին կազմակերպվել է հանրակրթական դպրոցների 1-3-րդ և 4-6-րդ դասարանների աշակերտների «Սպորտլանդիա» մարզական միջոցառումը:

- Ապրիլ-մայիս ամիսներին կազմակերպվել է «Հայաստանի Հանրապետության Վարչապետի գավաթ» դպրոցականների թիմային խճուղավազքի մարզային փուլը, որին մասնակցել են 47 հանրակրթական դպրոցների թիմեր՝ 329 մասնակից:
- Մայիս ամսին մարզի 12 հեծանվորդներ մասնակցել են «Հայաստանի Հանրապետության վարչապետի գավաթ» խճուղային հեծանվավազքի սիրողական մրցաշարին:
- Հուլիս ամսին մարզի լողորդները մասնակցել են «Հայաստանի Հանրապետության Վարչապետի գավաթ» լողի սիրողական մրցաշարին:
- Հուլիս ամսին կազմակերպվել և անցկացվել է ՀՀ Արմավիրի մարզի պետական և տեղական ինքնակառավարման մարմինների աշխատակիցների միջև ֆուտբոլի առաջնություն՝ 8 թիմերի մասնակցությամբ:
- ՀՀ Տավուշի մարզի Դիլիջան համայնքում 2022 թվականի սեպտեմբերի 3-ին անցկացված «Մշակութային վերածնունդ». արվեստների և արհեստների փառատոնին ներկայացվել է մարզի 6 համայնքների տաղավարներ՝ մշակույթի, արվեստի գործերի ցուցադրությամբ, ինչպես նաև երգի-պարի համույթների ելույթներ:
- Հոկտեմբեր ամսին մարզի հանրակրթական դպրոցներում ՀՀ ԿԳՄՍ նախարարության հետ համատեղ կազմակերպվել է «Քո արվեստը դպրոցում» մշակութային ծրագիրը՝ հայտնի արվեստագետների մասնակցությամբ, որին մասնակցել է 41 դպրոցների 383 աշակերտ:
- Սեպտեմբեր-նոյեմբեր ամիսներին կազմակերպվել է նախագորակոչային և զորակոչային տարիքի երիտասարդության հանրապետական ռազմամարզական խաղերի դպրոցական, տարածաշրջանային և մարզային փուլերը:
- Հոկտեմբեր ամսին ապահովվել է մարզի շուրջ 300 վազորդների մասնակցությունը «Հայաստանի Հանրապետության Վարչապետի գավաթ» խճուղային կրոսավազքի սիրողական մրցաշարին:

Առողջապահության բնագավառ

Մարզի առողջապահական համակարգում գործում են 56 բուժհաստատություններ, 52-ը՝ համայնքային, 4-ը՝ մարզպետարանի ենթակայության: Առողջապահության համակարգում աշխատում են 431 բժիշկներ, միջին բուժանձնակազմի թիվը 790 է: Մեկ բժիշկը սպասարկում է 707 բնակիչ: Մարզի բուժհաստատությունների մահճակալների թիվը 389- է:

Մարզպետարանի ենթակայության 4 բժշկական հաստատությունների գլոբալ բյուջեն 2022թ. դեկտեմբերի 1-ի դրությամբ կազմել է՝ 2,505,740.6 հազ. ՀՀ դրամ: 2021թ. տարեկան վճարովի ծառայությունները կազմել են 608,812.4 հազ. ՀՀ դրամ, մինչդեռ 2022թ. դեկտեմբերի 1-ի դրությամբ վճարովի ծառայությունները կազմել են 658,588.1 հազ. ՀՀ դրամ:

2022թ. դեկտեմբերի 1-ի դրությամբ մարզում գրանցվել է՝ 1826 ծնունդ, որից 1149-ը մարզի ծննդատներում, 677-ը՝ Երևան և այլ մարզեր:

2022թ. դեկտեմբերի 1-ի դրությամբ կենտրոնացված գնմամբ և մարդասիրական ճանապարհով տարբեր հիվանդությունների բուժման նպատակով ստացվել և բուժհաստատություններին է բաշխվել 151.296.241 հազ. ՀՀ դրամ արժողությամբ տարբեր դեղամիջոցներ, որից 109.761.223 հազ. ՀՀ դրամ արժողությամբ հակադիաբետիկ դեղամիջոցներ: Մարզում 2022թ. . դեկտեմբերի 1-ի դրությամբ մարզի ԱԱՊ օղակում հաշվառված են եղել 10198 դիաբետով հիվանդներ: 2022թ. դեկտեմբերի 1-ի դրությամբ մարզպետարանի ենթակայության առողջապահական հիմնարկներում աշխատավարձի պարտքեր չեն ձևավորվել:

Մասնավոր ընկերության հետ Արմավիր ԲԿ-ում տեղադրվել է համակարգչային շերտագրման սարք: Արմավիր ԲԿ-ի բակային հատվածում իրականացվել են բարելավման աշխատանքներ, կատարվել է ասֆալտապատում, ինչպես նաև վերանորոգվել է հիվանդանոցի ընդունարանը, ԲԿ-ում

հենաշարժողական խնդիրներ ունեցող երեխաների համար կառուցվել է խաղահրապարակ, մեկնարկել են ԲԿ-ի ինֆեկցիոն բաժանմունքի վերակառուցման աշխատանքները: ՀՀ Արմավիրի մարզպետարանի ջանքերով և ՀՀ ԱՆ ֆինանսավորմամբ ամբողջությամբ վերանորոգվում և վերազինվում է Էջմիածնի ԲԿ ՓԲԸ-ը, ինչպես նաև մարզի բուժհաստատություններին է տրամադրվել երկու շտապ օգնության մեքենա, որը առաջիկայում կհամալրվի ևս չորսով:

Լույս հայի աչքերին հիմնադրամի հետ համագործակցության արդյունքում Արմավիր ԲԿ-ում բացվել է ակնաբուժական աշխատասենյակ, որը հագեցած է վերջին սերդի սարքավորումներով: Մարզպետարանի ջանքերով պարբերաբար իրականացվում են սկրինինգային ծրագրեր, որի շրջանակներում մարզի բուժհաստատություններ են եկել մի շարք բժիշկներ, արդյունքում պացիենտներին տրամադրվել է անվճար խորհրդատվություն, իսկ անհրաժեշտության դեպքում իրականացվել են մի շարք հետազոտություններ: Նշեմ նաև, որ առաջիկա տարվա ընթացքում կվերանորոգվի Արմավիր ԲԿ-ի պոլիկլինիկայի մասնաշենքը: Աշխատանքները կրելու են շարունակական բնույթ, որն ունենալու է իր դրական ազդեցությունը մարզի բժշկական կազմակերպությունների որակյալ ծառայությունների մատուցման համար:

Սոցիալական պաշտպանության բնագավառում միասնական սոցիալական ծառայության 3 տարածքային կենտրոններում ընտանիքների անապահովության գնահատման համակարգում հաշվառված ընտանիքների փաստագրման աշխատանքների արդյունքում 2022թ. դեկտեմբերի 1-ի դրությամբ փաստագրված ընտանիքների թիվը 6795 է, որոնցից նպաստառու են 5225-ը, հրատապ դրամական օգնություն է ստացել 1142 ընտանիք: 2022թ. դեկտեմբերի 1-ի դրությամբ մարզի զբաղվածության տարածքային գործակալություններում հաշվառված են աշխատանք փնտրող 7021 մարդ, որոնցից գործազուրկի կարգավիճակ են ստացել 4726-ը: Գործակալություններում հաշվառված աշխատանք փնտրող անձանցից աշխատանքի են տեղավորվել 648 մարդ: Արմավիրի մարզային սոցիալական ապահովագրության տարածքային կենտրոններում հաշվառված են 33863 կենսաթոշակառուներ:

ՀՀ Արմավիրի «Մարզպետարանի կողմից իրականացվող ծրագրերի այլ նպաստներ բյուջեից» հոդվածով 2022թ. հաշվետու ժամանակահատվածում դրամական օգնություն է հատկացվել սոցիալապես անապահով 631 ընտանիքների՝ 23 330.0 հազ. դրամ գումարի չափով:

ՀՀ կառավարության որոշումների համաձայն մարզպետարանում հաշվառված է բնակարանային պայմանների բարելավման կարիք ունեցող հաշմանդամ դարձած՝ 105 զինծառայողների /ազատամարտիկների/ ընտանիք: 2022թ. ընթացքում մարզպետարանում հաշվառվել է Ադրբեջանի կողմից 2020 թվականի սեպտեմբերի 27-ին սանձազերծված 44-օրյա պատերազմի ժամանակ զոհված 17 զինծառայողի ընտանիք, որոնք համայնքների ղեկավարների որոշմամբ ճանաչվել են բնակարանի կարիքավոր:

ՀՀ պաշտպանության նախարարության համակարգի՝ հաշմանդամության զինվորական կենսաթոշակի իրավունք ունեցող նախկին զինծառայողների և զոհված (մահացած) զինծառայողների ընտանիքների բնակարանային պայմանների բարելավման հարցերով զբաղվող հանձնաժողովի որոշմամբ բնակարանի գնման վկայագրի միջոցով բնակարան կամ բնակելի տուն է ձեռք բերել զոհված (մահացած) զինծառայողի 7 ընտանիք:

Հիմք ընդունելով ՀՀ կառավարության համապատասխան որոշումը զինծառայողի կյանքին պատճառված վնասի դիմաց հատուցում ստանալու և զոհված (մահացած) զինծառայողի գերեզմանի բարեկարգման, տապանաքարերի պատրաստման և տեղադրման ծախսերի հատուցում ստանալու համար առողջապահության և սոցիալական ապահովության վարչության կողմից ՀՀ պաշտպանության նախարարություն են ներկայացվել 16 զոհված զինծառայողների ընտանիքների փաստաթղթեր, դատարանի օրինական ուժի մեջ մտած դատավճռով անհայտ բացակայող ճանաչված

8 անհետ կորած զինծառայողի գործեր: ՀՀ պաշտպանության նախարարություն են ներկայացվել 2 զինհաշմանդամների դիմումները /անհրաժեշտ փաստաթղթերի հետ միասին/ պետության կողմից նրանց հատուցում տրամադրելու նպատակով:

Զբաղվածության կարգավորման ամենամյա պետական ծրագրով նախատեսվել է ՀՀ Արմավիրի մարզում իրականացնել «Սեզոնային զբաղվածության խթանման միջոցով գյուղացիական տնտեսությանն աջակցության տրամադրման» ծրագիրը: 2022 թվականին ՀՀ Արմավիրի մարզին հատկացվող ֆինանսական միջոցների չափը կազմել է 21954.32 հազ. ՀՀ դրամ՝ 87 ծրագրի համար (Արմավիր՝ 8327.5 հազ. ՀՀ դրամ, 33 ծրագիր, Բաղրամյան՝ 3028.18 հազ. ՀՀ դրամ, 12 ծրագիր, Վաղարշապատ՝ 10598.64 հազ. ՀՀ դրամ, 42 ծրագիր):

ՀՀ կառավարության համապատասխան որոշումներով կարգավորվում է 1988-1992 թվականներին Ադրբեջանից բռնի տեղահանված ընտանիքների բնակարանային ապահովության ծրագրի իրականացումը ՀՀ մարզերում: Միգրացիոն ծառայության և մարզպետարանի առողջապահության և սոցիալական ապահովության վարչության աշխատակիցների կողմից 2022թ. գարնանից սկսվել է մարզերում բնակվող հավակնորդ շահառուների վերահաշվառման գործընթացը, որի արդյունքում մարզում վերոնշյալ ծրագրի շահառու է ճանաչվել 12 ընտանիք, որոնց կառաջարկվի ներկայացնել դիմում՝ բնակարանի գնման վկայագիր ստանալու համար, ծրագիրը շարունակական է:

Ընտանիքի, կանանց և երեխաների իրավունքների պաշտպանություն. իրականացվել են աշխատանքներ՝ ընտանեկան բռնության 57 դեպքերի հաշվառման և հետագա մասնագիտական շարունակական աշխատանքի և միջգերատեսչական համագործակցության ապահովման ուղղությամբ: Կազմակերպվել է 166 երեխայի կրթության առանձնահատուկ պայմանների կարիքի վկայագրումը և ապահովվել է ներառական կրթություն իրականացնող ուսումնական հաստատություններում՝ իրենց կարիքներին համապատասխան կրթական ծրագրերում երեխաների ընդգրկումը:

Մուրացկանությամբ և թափառաշրջիկությամբ զբաղվող երեխաների հիմնախնդիրների լուծման ուղղությամբ համայնքներում գործող խնամակալության և հոգաբարձության հանձնաժողովների, ոստիկանության համապատասխան աշխատակիցների հետ կազմակերպվել են տուն-այցեր, մարզում բնակվող սոցիալապես անապահով այն ընտանիքներ, որտեղ առկա էր անչափահասների հետ կապված լուրջ խնդիրներ: Խնդիրների լուծման նպատակով տարվել են մասնագիտական աշխատանքներ, ցուցաբերվել նյութական աջակցություն, ծնողների հետ տարվել են բացատրական աշխատանքներ:

Մարզի հանրակրթական ուսումնական հաստատությունների տնօրենների հետ անցկացվել է հանդիպում- քննարկումներ պարտադիր կրթությունից դուրս մնացած երեխաների հիմնահարցերի առնչությամբ: Համատեղ աշխատանքների արդյունքում ձեռնարկվել է հնարավոր բոլոր միջոցները պարտադիր ուսուցումից դուրս մնացած 43 աշակերտներին ուսումնական պրոցեսում ընդգրկելու համար:

Հավաքագրվել է ՀՀ ոստիկանության Արմավիրի մարզային վարչության անչափահասների գործերով և ընտանեկան բռնության կանխարգելման բաժանմունքում հաշվառման մեջ գտնվող և փաստացիորեն հայտնի մուրացիկ, թափառաշրջիկ, իրավախախտ, հանցագործության կատարման մեջ մեղադրվող, անչափահաս երեխաների վերաբերյալ տեղեկատվություն՝ նրանց շրջանում համապատասխան աշխատանքներ կատարելու նպատակով: Իրականացված աշխատանքների արդյունքում 14 անչափահասներ դուրս են եկել հաշվառումից, 9 անչափահասների վարքագծի նկատմամբ իրականացվել է հսկողություն:

Սկզբնական հաշվառման վերցված առանց ծնողական խնամքի մնացած թվով 4 երեխաների անձնական գործերը ներկայացվել են ՀՀ Աշխատանքի և Սոցիալական Հարցերի Նախարարության կենտրոնացված հաշվառման: Մարզի բնակիչ հանդիսացող 8 քաղաքացիներ հաշվառվել են, որպես

որդեգրել ցանկացող անձինք ներկայացվել են ՀՀ Աշխատանքի և Սոցիալական Հարցերի Նախարարության կենտրոնացված հաշվառման: Խնամատար ընտանիքում տեղավորված 3 երեխաների ընտանիքների նկատմամբ իրականացվել է մշտադիտարկում և նրանց հետ կնքված պայմանագրերը երկարացվել են: Փաստացի առանց ծնողական խնամքի մնացած 2 երեխաներ տեղավորվել են «Մեր տուն» հասարակական կազմակերպություն և 1 երեխա «Զատիկ երեխաների աջակցության» կենտրոնից տեղավորվել է և վերամիավորվել ընտանիքի հետ: Մասնակցություն է ցուցաբերվել 28 դատական նիստերի, որտեղ անհրաժեշտություն է առաջացել որպես երրորդ անձ հանդես գալու և երեխայի կարծիքը լսելու գործընթացում: Մարզում կազմակերպվել և աջակցվել է երեխաներին նվիրված և նրանց հիմնախնդիրների քննարկմանն ուղղված մի շարք միջոցառումներ: Համագործակցելով Միասնական սոցիալական ծառայության կենտրոնների, համայնքների խնամակալության և հոգաբարձության հանձնաժողովների հետ կյանքի դժվարին իրավիճակում հայտնված 4 երեխաներ ժամանակավորապես հանձնվել են այլընտրանքային խնամքի:

Կազմակերպվել է մարզի սոցիալապես անապահով և առավել խոցելի 200 երեխաների հանգստը Հանքավանի «Հասմիկ» ճամբարում և թվով 20 ծնողազուրկ, Արցախյան 44-օրյա պատերազմում զոհված ընտանիքների երեխաների հանգիստը՝ Հանքավանի «Արագած» ճամբարում, և Արցախյան 44-օրյա պատերազմի հետևանքով մարզում վերաբնակեցված արցախցի ընտանիքների 12 անչափահաս երեխաների հանգիստը Սլովենիայի Հանրապետությունում: Աջակցություն է ցուցաբերվել մարզում գործունեություն իրականացնող հասարակական կազմակերպություններին՝ իրականացնել մարզային ծրագրեր:

Տարածքային կառավարման, տեղական ինքնակառավարման, համայնքային ծառայության և հանրապետական գործադիր մարմինների տարածքային ստորաբաժանումների գործունեությանն առնչվող հարցեր: 2022թ. մշտական կապի մեջ լինելով մարզի տեղական ինքնակառավարման մարմինների հետ նրանց տրամադրել է անհրաժեշտ խորհրդատվություն իրենց սեփական և պետության կողմից պատվիրակված լիազորությունների իրականացման հարցերով, ինչպես նաև վերահսկել է պետության կողմից համայնքին պատվիրակված լիազորությունների կատարման ընթացքը և պարտադիր լիազորությունների կատարումը: Շարունակաբար հսկողություն է իրականացվել մարզի համայնքների ավագանու նիստերի հրավիրման պարբերականության, ավագանու և համայնքի ղեկավարի որոշումները, համայնքի ղեկավարի կարգադրությունները սահմանված կարգով մարզպետարան ներկայացնելու նկատմամբ և դրանց համապատասխանությունը գործող օրենսդրությանը, ինչպես նաև համայնքներում տեղական ինքնակառավարման մարմինների կողմից քաղաքացիների դիմում-բողջներին, առաջարկություններին, քաղաքացիների ընդունելություններին և նրանց կողմից բարձրացրած հարցերին օրենսդրությամբ սահմանված կարգով ընթացք տալու գործընթացներին:

2022թ. ընթացքում մարզի՝ Ֆերիկ, Արմավիր և Բաղրամյան համայնքներում իրականացրել են իրավական հսկողության աշխատանքներ: Մեթոդական աջակցություն են ցուցաբերել մարզի 7 խոշորացված համայնքների աշխատակազմերի ձևավորմանը: Համայնքային ծառայության թափուր պաշտոններում 532 քաղաքացու հետ կնքվել են ժամկետային աշխատանքային պայմանագրեր: Համայնքապետարաններում կադրային գործի վարման, համայնքային ծառայության թափուր պաշտոններ զբաղեցնելու համար անցկացվող մրցույթների նախապատրաստման և կազմակերպման, վերաբերյալ համայնքապետարանների աշխատակազմերի քարտուղարների ժամանակավոր պաշտոնակատարներին տրվել են խորհրդատվություններ: Յուրաքանչյուր ամսվա վերջին աշխատանքային օրը պետական լիազորված մարմին է ուղարկվել մարզում տվյալ ամսվա ընթացքում նշանակված մրցույթների և ատեստավորումների արդյունքները, ինչպես նաև հաջորդ ամսվա ժամանակացույցերը: Համայնքային ծառայության թափուր պաշտոնները զբաղեցնելու համար

հայտարարվել են 521 մրցույթներ, կայացել է 453 մրցույթ, որոնց մասնակցել է 531 քաղաքացի: Հաղթող է ճանաչվել 452 քաղաքացի, որոնք նշանակվել են համապատասխան պաշտոններում:

2022 թվականին «Աուֆորս» ՍՊԸ-ի հետ համատեղ մարզպետարանում անցկացվել են 80 համայնքային ծառայողների հերթական վերապատրաստման դասընթացներ, ՀՀ կառավարման ակադեմիայի հետ 46 ավագանու անդամների և 6 համայնքների ղեկավարների վերապատրաստումներ: Ապահովվել է համագործակցությունը համայնքների ղեկավարների, տարածքային ընտրական հանձնաժողովների, ՀՀ անձնագրային և վիզաների վարչության Արմավիրի, Վաղարշապատի, Մեծամորի և Բաղրամյանի բաժանմունքների հետ, ՀՀ արտակարգ իրավիճակների նախարարության փրկարար ծառայության ՀՀ Արմավիրի մարզային փրկարարական վարչության հետ: Կազմել և ՀՀ արտակարգ իրավիճակների նախարարության «Ճգնաժամային կառավարման պետական ակադեմիա» է ուղարկել համապատասխան 2022թ. ունկնդիրների պլան-գրաֆիկը և մշտական հսկողություն է իրականացրել նրանց կողմից դասընթացների մասնակցությանը:

Ապահովվել է համագործակցությունը ՀՀ ՊՆ Զ և ԶՀԾ տարածքային ստորաբաժանման հետ:

Մասնակցություն է ցուցաբերվել 2021 թվականի ձմեռային և 2022 ամառային զորակոչերի կազմակերպման և անցկացման գործընթացին: Մշտապես ուշադրության կենտրոնում է պահվել մարզի երեք կազմակերպություններում այլընտրանքային ծառայություն կատարող անձանց աշխատանքային և կենցաղային պայմանների ապահովման և իրենց օրենքով սահմանված կարգով պարտականությունների կատարման ուղղությամբ: Այլընտրանքային ծառայության վերաբերյալ հավաքվել է տեղեկատվություն մարզի չորս համայնքներից և ներկայացվել է ՀՀ տարածքային կառավարման և ենթակառուցվածքների նախարարության համապատասխան հանձնաժողովին:

Ապահովվել է մարզի վարչական տարածքում տեղակայված զորամասերի, մարզի գործադիր մարմինների ստորաբաժանումների և համայնքների միջև կապը և փոխգործակցությունը:

Մարզի 6 քաղաքացիներից ստացվել են դիմումներ ՌԴ մուտքի թույլտվության արգելքը վերացնելու վերաբերյալ, որոնք ուղարկվել են ՀՀ տարածքային կառավարման և ենթակառուցվածքների նախարարության միգրացիոն պետական ծառայություն, իսկ ստացված պատասխանների և պարզաբանումների մասին տեղեկացվել են դիմումատու քաղաքացիներին:

Զորահավաքային նախապատրաստություն. կազմակերպվել և համակարգվել են մարզի և մարզպետարանի զորահավաքային նախապատրաստության և քաղաքացիական պաշտպանության աշխատանքները: Մարզի համայնքների, վարչական ղեկավարների, դպրոցների տնօրենների և զինղեկների մասնակցությամբ կազմակերպվել է հավաք խորհրդակցություն «ՀՀ ՊՆ ռազմաուսումնական հաստատություններում դիմորդների գրավչության բարձրացման» թեմայով: Համագործակցելով ՀՀ ՊՆ Զ և ԶՀԾ Արմավիրի տարածքային ստորաբաժանման և տեղական ինքնակառավարման մարմինների հետ իրականացվել են զորահավաքային նախապատրաստության և զորահավաքային ռեսուրսների ուսումնասիրման, ճշգրտման աշխատանքներ: Շարքային կազմի պարտադիր զինվորական ծառայության զորակոչերի ընթացքում նախապատրաստվել են մարզային զորակոչային հանձնաժողովի նիստերը և մասնակցել հանձնաժողովի աշխատանքներին:

Հաստատվել և հստակեցվել են համայնքներում ծավալվող ազդարարման տեղամասերի հասցեները, տեղամասերի պետերի անվանացուցակները և զորահավաքին վերաբերող այլ մանրամասներ: Նախապատրաստվել են մարզպետարանի աշխատանքային ռեժիմների փոխադրման պլանը և պլանի քաղվածքները, կազմակերպվել են վարժական հավաքներում ընդգրկված մարզի զինապարտ քաղաքացիների ծանուցման աշխատանքները, տարվել է մարզպետարանի զինապարտ աշխատակիցների հաշվառում և ամրագրում: Սահմանված կարգով վարվել են առկա գրանցամատյանները: 2022թ. սեպտեմբերի 13-ին ադրբեջանական զինված խմբավորումների կողմից ՀՀ սահմանների վրա իրականացված ռազմական ագրեսիայի հետևանքով հավաքագրվել է մարզում

գրանցված վիրավոր և անհետ կորած զինծառայողների մասին տեղեկատվության հավաքագրում, իսկ համայնքապետարանների միջոցով կազմակերպվել է զոհված զինծառայողների մարմինների տեղափոխման և հուղարկավորության միջոցառումները:

Զարգացման ծրագրեր, մոնիտորինգ և վերլուծություն. Կազմվել է ՀՀ Արմավիրի մարզի 2017-2025թթ. զարգացման ռազմավարության իրականացման մարզի 2022թ. գործունեության ծրագրի նախագիծը, որը հաստատվել է ՀՀ տարածքային կառավարման և ենթակառուցվածքների նախարարի հրամանով: Կազմվել է ՀՀ տարածքային կառավարման և ենթակառուցվածքներ նախարարություն են ներկայացվել ՀՀ Արմավիրի մարզի 2017-2025թթ. զարգացման ռազմավարության իրականացման 2021թ. գործունեության ծրագրի տարեկան և 2022թ. գործունեության ծրագրի կիսամյակային մոնիտորինգի հաշվետվությունները՝ հաշվի առնելով նախարարություններից, գերատեսչություններից և համայնքներից ստացված տեղեկատվությունը:

Սուբվենցիոն ծրագրեր. 2022թ. ընթացքում աջակցություն է ցուցաբերվել համայնքներին սուբվենցիաներ ստանալու նպատակով հայտերի մշակման, սահմանված կարգով ՀՀ ՏԿԵՆ ներկայացման և ծրագրերի իրականացման ողջ ընթացքում: Մարզի սուբվենցիոն ծրագրերի ընթացքի վերաբերյալ համապատասխան տեղեկատվությունը, ծրագրերի իրականացման ընթացքը լուսաբանող լուսանկարները պարբերաբար հրապարակվել են մարզպետարանի պաշտոնական կայքում և ֆեյսբուքյան էջում: Մարզպետի և մշտադիտարկման աշխատանքային խմբի անդամների կողմից պարբերաբար այցելություններ են կատարվում համայնքներ՝ շինարարական աշխատանքների ընթացքի նկատմամբ հսկողություն իրականացնելու նպատակով: 2022թ. ընթացքում հավանության են արժանացել 41 միավորված սուբվենցիոն ծրագրեր 147 ենթածրագրերով (ներկայացված 8 համայնքների կողմից): 2022թ. սուբվենցիոն ենթածրագրերը սկսվել են և ընթացքի մեջ են, որոշ ենթածրագրեր ավարտվել են և մարզպետարանը ամենօրյա ուշադրության կենտրոնում է պահում իրականացվող աշխատանքների որակյալ և պայմանագրով սահմանված ժամկետում ավարտելու ողջ ընթացքը:

Արտաքին կապեր. 2022թ. ընթացքում մարզի տնտեսության զարգացմանը նպաստող ներդրումային հնարավորությունների բացահայտման, մարզում հնարավոր ներդրողների ներգրավման և մարզի սոցիալ-տնտեսական զարգացմանը նպաստող համատեղ ծրագրեր իրականացնելու նպատակով արտաքին կապերի բնագավառում շարունակվել է համագործակցությունը նախկինում հաստատված կապերով և նոր կապեր ու համագործակցություններ սկսելու համար գործուն քայլեր են ձեռնարկել: Տարվա ընթացքում աշխատանքներ են տարվել համագործակցության նոր կապեր ստեղծելու և նոր հուշագրեր ստորագրելու ուղղությամբ: Կայացել են հանդիպումներ մարզպետի և Հայաստանում Նիդերլանդների թագավորության արտակարգ և լիազոր դեսպանի, Բելառուսի Հանրապետության արտակարգ և լիազոր դեսպանի, Գերմանիայի Դաշնային Հանրապետության դեսպանի, ՉԺՀ արտակարգ և լիազոր դեսպանի հետ: Դեսպանների հետ հանդիպումների ընթացքում կողմերը քննարկել են նաև վարչական միավորների միջև առկա հարաբերությունները զարգացնելուն և նոր կապեր հաստատելուն վերաբերող հարցեր:

Մարզպետի գլխավորած պատվիրակությունը մասնակցել է 2022թ. հունիսի 29-30-ը ք. Լիոնում կայացած հայ-ֆրանսիական ապակենտրոնացված համագործակցության չորրորդ համաժողովին, որտեղ ելույթ է ունեցել մարզպետ Է. Հովհաննիսյանը:

ԳԴՀ Սաքսոնիա-Անհալթ երկրամասի և Արմավիրի մարզի միջև ապակենտրոնացված համագործակցության ամրապնդման շրջանակներում, ԳԴՀ-ում ՀՀ դեսպանության կողմից իրականացված աշխատանքների արդյունքում, գերմանական կողմի հետ ձեռք բերված պայմանավորվածության հիման վրա նոյեմբերի 14-18 մարզպետի գլխավորած պատվիրակությունը այցելել է Սաքսոնիա-Անհալթ երկրամասի Բուրգենլանդ շրջան, ինչպես նաև Նաումբուրգ քաղաք՝

մարզերի և Արմավիր-Նաուսբուրգ քաղաքների միջև համագործակցության հուշագրեր ստորագրելու նպատակով: 2022թ. դեկտեմբերի 14-17-ը Բաշկորտոստանի Հանրապետության մայրաքաղաք Ուֆայում անցկացվելիք «Միջազգային բիզնես շաբաթ» ֆորումին մասնակցել է մարզի պատվիրակությունը:

Մարզպետարանի գործունեության կազմակերպման ընդհանուր հարցեր: 2022թ. հաշվետու ժամանակահատվածում արդյունավետ աշխատանքներ են կատարվել նաև մարզպետարանում գործառնության վարման, փաստաթղթերի ընդունման, օպերատիվ հաշվառման և տնօրինման միասնական համակարգի պահպանման, մարզպետարանի կարիքների համար 2022 թ. պետական բյուջեով նախատեսված և համապատասխան ծախսային ծրագրերի իրականացման նպատակով գնվելիք ապրանքների, աշխատանքների և ծառայությունների անվանացանկում ընդգրկված ապրանքանյութական արժեքների ձեռքբերման, հաշվառման, մարզպետարանին ամրացված անշարժ գույքի նկատմամբ գույքային իրավունքների պաշտպանության և այդ գույքի արդյունավետ օգտագործմանն ուղղված միջոցառումների, մարզպետարանի վարչական շենքի կոմունալ ծառայությունների տեխնիկական, ինչպես նաև մարզպետարանի տրանսպորտային սպասարկման ապահովմանն ուղղությամբ:

Այսպես, հաշվետու ժամանակահատվածում մուտքագրվել է ընդհանուր քանակով 20206 և առաքվել 7664 փաստաթուղթ, տարաբնույթ հարցերի կապակցությամբ ընդունվել է մարզպետի 698 որոշումներ:

Մարզպետարան առաջարկություններով, դիմումներով և բողոքներով քաղաքացիների դիմելը դիտելով որպես անձի իրավունքների իրականացման և պահպանման, բնակչության հետ մարզպետարանի կապերի ամրապնդման կարևորագույն միջոց, հետևողական աշխատանքներ են տարվել օրենսդրությամբ սահմանված կարգով ու ժամկետներում քաղաքացիների առաջարկությունները, դիմումներն ու բողոքները քննության առնելու, օրենսդրությանը համապատասխան դրանցում արձարժված խնդիրների լուծումն ապահովելու և պատասխանելու նպատակով անհրաժեշտ միջոցներ ձեռնարկելու ուղղությամբ: Այսպես, նշված ժամանակահատվածում ստացվել է քաղաքացիների ընդհանուր թվով 1796 տարաբնույթ դիմումներ, առաջարկություններ և բողոքներ, որոնց գերակշիռ մասին օրենսդրությամբ սահմանված կարգով տրվել են համապատասխան լուծումներ: Մարզպետի մոտ կազմակերպված ընդունելություններին գրանցված 67 քաղաքացիներից ընդունելություններին մասնակցել են 59 քաղաքացիներ, որոնց կողմից բարձրացված հարցադրումներից դրական լուծում են ստացել 28-ը, օրենսդրությանը համապատասխան սպառիչ պարզաբանումներ են ստացել 26-ը, իսկ 5 հարցադրումների քննարկումն ու համապատասխան լուծումներ տալը ընթացքի մեջ է:

Ակտիվ աշխատանքներ են կատարվել նաև մարզպետարանի արխիվային փաստաթղթերի մշակման, արխիվային ֆոնդի գործերի և համապատասխան փաստաթղթերի սահմանված կարգով մարզպետարանի արխիվ հանձնման, ընդունման, հաշվառման, պահպանման, մատչելիության ապահովման, դրանց հիմքերի մշակման և հետագայում պետական արխիվային պահպանության հանձնելու ուղղությամբ:

Իրավական հարցեր. 2022թ. ընթացքում մարզպետի կողմից ընդունվել է 698 որոշում, որոնք ներկայացվել են տարածքային կառավարման ոլորտը համակարգող փոխվարչապետին և դրանց նկատմամբ իրավական հսկողության արդյունքում գնահատվել են իրավաչափ: Օրենսդրական տեխնիկայի կանոնների կիրառման իրազեկման ուղղությամբ պարբերաբար համայնքներ, մարզային ենթակայության հանրակրթական ուսումնական, ինչպես նաև բժշկական հաստատություններ են ներկայացվել մեթոդական շրջաբերական գրություններ: Մարզպետարան ներկայացված տարբեր ոլորտներին վերաբերող նորմատիվ իրավական ակտերի նախագծերի վերաբերյալ մշակվել և

ներկայացվել են հիմնավորված առաջարկություններ, որոնք իրատեսական են գնահատվել և իրենց ուրույն տեղ են գտել շրջանառվող նախագծերում:

Անձնակազմի կառավարում. 2022թ. մարզպետարանի հաստիքային միավորների թիվը եղել է 96 է, քաղաքացիական ծառայողների հաստիքների թիվը՝ 75: 2022թ. դեկտեմբերի 13-ի դրությամբ մարզպետարանում քաղաքացիական ծառայության ժամանակավոր թափուր պաշտոնների թիվը 13-ն է, որոնցից 2-ը համալրված են պայմանագրային աշխատողներով, թափուր են նաև մարզպետի տեղակալի, մարզպետի տեղակալի օգնականի 2-ական և մարզպետի խորհրդականի 1 հաստիքները (ընդհանուր թվով 5): Քաղաքացիական ծառայության 11 պաշտոն համալրելու նպատակով հայտարարվել է 13 մրցույթ: Մրցույթների արդյունքում հաղթող ճանաչված անձինք նշանակվել են համապատասխան պաշտոններում:

Հայտարարվել է մրցույթ «Արմավիրի Զարիշատ (Արամ) Մարտինի Մկրտչյանի անվան բժշկական կենտրոն» ՓԲԸ տնօրենի թափուր պաշտոնն զբաղեցնելու համար, որոնցից 1-ի արդյունքում հաղթող չի ճանաչվել, իսկ 2-րդը կկայանա 2023թ. հունվարի 11-ին: Հայտարարվել է նաև «Մեծամորի բժշկական կենտրոն» ՓԲԸ տնօրենի թափուր պաշտոնն զբաղեցնելու համար 2023 թվականի հունվարի 24-ին անցկացվելիք մրցույթը:

Տեղեկատվության և հասարակայնության հետ կապեր. Ոլորտը համակարգող օրենսդրությամբ սահմանված կարգով ապահովվել է Արմավիրի մարզպետի, մարզպետարանի գործունեության վերաբերյալ հասարակության իրազեկումը՝ մամուլի հաղորդագրություններ, տեղեկանքներ, հաշվետվություններ, ծրագրեր, հայտարարություններ, պարտադիր հրապարակման ենթակա այլ տեղեկատվական բնույթի նյութեր մարզպետարանի պաշտոնական կայքի, ֆեյսբուքյան էջի, ինչպես նաև ԶԼՄ հարթակներով տարածելու միջոցով: Առանձին դեպքերում ապահովվել է նաև համայնքապետարաններին և մարզպետարանի ենթակայությամբ գործող կրթական ու առողջապահական հաստատություններին վերաբերող տեղեկությունների լուսաբանումը:

Աջակցություն է ցուցաբերվել Համայնքային կառավարման տեղեկատվական համակարգի շահագործման և «Mulberry» էլեկտրոնային փաստաթղթաշրջանառության համակարգի միջև փոխգործակցության ապահովման, ինչպես նաև համայնքապետարաններում պաշտոնական կայքերի ներդրման և վարման աշխատանքներին: